

समे – 12.25

<><><><><><>

PM ASEAN Summit

प्रधानमंत्री नरेन्द्र मोदी होंरें इस गल्लै पर जोर दिता ऐ जे पूरे खित्ते दी रमानदारी ते तरक्की लेई इक आजाद, खुल्ले, समावेशी, समृद्ध ते नियमें पर आधारित हिंद-प्रशांत खेत्तर दा होना बड़ा महत्वपूर्ण ऐ। उनें आखेआ जे दक्खनी चीन सागर दी शांति, सुरक्षा ते स्थिरता पूरे हिंद-प्रशांत खेत्तर दे हितै च ऐ। प्रधानमंत्री अज्ज लाओस पीडीआर दे वियनतियाने च 19में पूर्वी एशिया शिखर सम्मेलन च बोला करदे हे। दुनिया दे बक्ख-बक्ख खेत्तरें च चलै करदे संघर्ष पर चेंता जाह करदे होई श्री मोदी होंरें आखेआ जे विस्तारवाद नेई सगुआं विकास दा नजरिया होना लोड़चदा ऐ। उनें आखेआ जे बक्ख-बक्ख खेत्तरें च चलै करदे संघर्षे दा वैश्विक दक्खन दे देशें पर नकारात्मक असर पवै करदा ऐ। उनें आखेआ जे हर कोई चांहदा ऐ जे यूरेशिया ते पच्छमी एशिया खेत्तर च रमानदारी ते स्थिरता ब्हाल होऐ। उनें दोहराया जे एह जंग दा जुग नेई ऐ ते समस्याएं दा हल जंग दे मैदान राहें नेई होई सकदा। प्रधानमंत्री होंरें इस गल्लै पर जोर दिता जे संप्रभुता, इलाकाई अखंडता ते अंतर्राष्ट्री कानूनें दा सम्मान करना जरूरी ऐ। उनें आखेआ जे मनुक्खी नजरिया, गल्लबात ते कूटनीति पर जोर दिता जाना लोड़चदा ऐ। उनें इब्बी आखेआ जे भारत इस दिशा च हर मुमकन जोगदान देना जारी रक्खोग। आतंकवाद गी आलमी सतह पर रमानदारी ते सुरक्षा लेई इक गंभीर चुनौती करार दिंदे होई प्रधानमंत्री होंरें जोर देइयै आखेआ जे आतंकवाद करी पैदा चुनौतियें कन्नै निब्बड़ने लेई समूलची मनुक्ख जाति गी मिलियै कम्म करना होग। उनें आखेआ जे साइबर, समुंदर ते अंतरिक्ष दे खेत्तरें च बी सैहयोग गी मजबूत करना होग। अपने भाषणै दरान प्रधानमंत्री होंरें तूफान यागी दी मारै

हेठ आए दे लोकें प्रति अपनी संवेदना जताई। उनें आखेआ जे भारत नै ऑपरेशन सद्भाव दे तैहत मनुक्खी सहायता प्रदान कीती ऐ।

<><><><><><>

ASEAN India Peace

भारत ते आसियान देशें अंतर्राष्ट्रीय कानून के मान्य सिद्धांतें मुजब विवादें दे शांतिपूर्ण हल ते समुंदरी सुरक्षा गी बढावा देने पर बल दिता ऐ। आसियान-भारत रणनीतिक सांझेदारी मजबूत करने सरबन्धी सांझे बयाना च भारत ते आसियान नेताएं दक्खनी चीन सागर च आचार संहिता दी असरदार ढंग्गै सिर अमल-आवरी दा बी समर्थन कीता। समुंदरी ते साइबर सुरक्षा, आंतकवाद ते अंतर्राष्ट्री अपराधें कन्नै निब्बड़ने, आपदा राहत ते मनुक्खी मदाद सने शांति बहाली ते समर्थ निर्माण दे उपाएं च सैहयोग बधाने पर बी सैहमति बनी ऐ।

<><><><><><>

Maha Navami

अज्ज महानौमी दा पर्व पूरे देसै च पूरी धार्मिक श्रद्धा ते खुशी कन्नै मनाया जा'रदा ऐ। एहदे कन्नै 9वें दिनें तगर चले दा नरातें दा पवित्तर पर्व बी संपन्न होआ करदा ऐ। एह दिन, महिशासुर नांs दे राक्षस पर देवी दुर्गा हुंती जित्त दा बी प्रतीक ऐ। राष्ट्रपति द्रौपदी मुर्मु होरें लोकें गी महानौमी दिआं ममारखां दिंदे होई आखेआ ऐ जे एह ध्याडा बुराई पर अच्छाई दी जित्त दा प्रतीक ऐ। उनें आखेआ जे इस ध्याड़े असें'गी सब्बनें धर्म बशकार एकता ते समझ गी बढावा देना लोड़चदा ऐ। लेफ्टिनेंट गवर्नर मनोज सिन्हा होरें बी लोकें गी महानौमी दिआं ममारखां दिंदे होई आखेआ ऐ जे मां दुर्गा शक्ति दा प्रतीक न ते ओह मां दुर्गा अग्गे एह प्रार्थना करदे न जे ओह असें सब्बनें गी नेकी दी बतै पर टुरने

दा अर्शीवाद देन। उनें इब्बी कामना कीती ऐ जे एह पर्व आपसी भाईचारे दिएं तंदें गी होर मजबूती देऐ।

<><><><><><>

Basohli Utsav

बसोहली उत्सव कल्लै थमां शुरु होई गेआ। एहदा आयोजन खिते दी शानदार ते जीवंत सांस्कृतिक विरासत दा जशन मनाने लेई कीता जंदा ऐ। कल इस उत्सव दे पैहले रोज इक रंगारंगा सांस्कृतिक कार्यक्रम दा आयोजन कीता गेआ जिन्नै उत्थे मजूद सब्बनें लोकें दा मन परचाई लैता। संस्कृति विभाग दे प्रधान सचिव सुरेश कुमार गुप्ता होरें इस उत्सव दा उद्घाटन करदे परैन्त आखेआ जे एह आयोजन, बसोहली दे ऐतिहासिक गौरव ते खासकरियै कला ते विरासत च एहदी समृद्ध परंपराएं दे संरक्षण लेई समर्पित जतनें गी दर्शादा ऐ। उनें बसोहली दिएं चितरकारिणें ते पशमीना लेई जीआई टैग दे महत्वै पर लोs पाई ते आखेआ जे एहदे कन्नै पक्क गै मुकामी कारीगरें ते दस्तकारें लेई कम्म-रोजगार दे नमें मौके पैदा होडन। त्र'ऊं दिनें दे इस उत्सव दरान सांस्कृतिक कार्यक्रमें, प्रदर्शनिणें ते कार्यशालाएं दा सरिस्ता कीता जाहग।

<><><><><><>

Hizb-ut-Tahrir-UAPA

केन्द्र सरकारै, हिज्ब-उत-तहरीर ते एहदे सब्बनें संगठनें गी गैर-कनूनी गतिविधिणें दी रोकथाम सरबन्धी कनून तैहत आतंकवादी गुट करार देई दिता ऐ। जारी इक अधिसूचना च गृह मंत्रालय नै आखेआ ऐ जे हिज्ब-उत-तहरीर, कथित तौरा पर आईएस.आईएस आहला लेखा मासूस नौजवानें गी कट्टरवाद ते आतंकवाद दी बत्ता पर पाने ते आतंकवादी गतिविधिणें लेई रपेआ-पैसा जुटाने दा कसूरवार ऐ।

<><><><><><>

JK Panchayat Polls

जम्मू-कश्मीर च इस ब'रे दे अखीरै शा पैहले पंचैतें ते शैही मुकामी निकायें दे चुनांs करोआई लैते जाने दी मेद ऐ। आकाशवाणी दे जम्मू संवाददाता मुजब, स्टेट इलैक्शन कमिशन नै प्रदेश च पंचैतें दे चुनां करोआने दी प्रक्रिया रम्भी दित्ती ऐ ते सब्बनें डिप्टी कमिशनरें गी एह हिदायतां दित्तिआं गोइयां न जे ओह पंचैत मतदाता सूचिएं दिआं ताजा-तरीन नकलां उपलब्ध करोआन। प्रदेश च लोकसभा ते विधानसभा दे चुनांs कामयाबी कन्नै करोआने परैन्त हुन पंचैतें ते शैही मुकामी निकायें दे चुनाएं दिआं तैयारियां चलै करदिआं न ते इनेंगी दिसम्बर म्हीने तोहड़ी करवाई लैता जाहग। इस मकसद लेई प्रदेश च असेम्बली चुनाएं लेई तैनात सुरक्षाबलें गी मुंसिपल ते शैही मुकामी निकायें दे चुनाएं तोहड़ी इत्थे बरोबर तैनात रक्खेआ जाहग। जम्मू ते श्रीनगर च मुंसिपल कारपोरेशनें दा कार्यकाल पिच्छले ब'रे नवम्बर म्हीने दा पूरा होई गेदा ऐ। पंचैतें ते शैही मुकामी निकायें दे चुनाएं दे कन्नै गै जम्मू-कश्मीर च दफा 370 हटाए जाने दे बाद पैहली बारी पूरी-पराती लोकतांत्रिक बवस्था स्थापित होई जाहग। एहदे शा पैहले 2018 दे चुनाएं च 27 जहार 281 पंच ते सरपंच चुने गे हे।

<><><><><><>

ICC T20 Cricket

महिलाएं दे आईसीसी टी20 क्रिकेट विश्व कप च अज्ज स'झां साङ्ढे 7 बजे दुबई च अस्ट्रेलिया ते पाकिस्तान दिआं टीमां आमने-सामने होडन। तोआई भारती टीम औंदी 13 तरीक गी अस्ट्रेलिया दे खलाफ गुप स्टेज दा अपना खीरी मैच खेड्ढोग। अक्वल दर्जे दिएं चार टीमें च अपनी थाह पक्की करने आस्तै भारत लेई अस्ट्रेलिया गी हराना जरूरी होग पर जेगर ईआं नेईं हुंदा तां

सेमीफाईनल तोहड़ी पुज्जने च भारत गी दिक्कतें दा सामना करना पेई सकदा
ऐ।

<><><><><><>